

INUIT ATAQATIGIIT

Inatsisartuni



20. november 2020

Inatsisartut Suleriaasianni § 37 imm. 1 naapertorlugu Naalackersuisunut apeqquut imaattoq matumuuna saqqummiuppara.

Naalackersuisunut apeqquut:

1. UKA2019/131 aqutigalugu Naalackersuisut peqquneqarput Namminersorlutik Oqartussat ingerlataanni errorsinermut qaqorsaait aammalu kingunerutit avatangiisinut innarliisuunngitsunik nalunaaqutsikkanik aammalu tipigissaateqanngitsunik taamaallaat atuilernissaat qulakkiissagaat.

§37_120/2020-mut akissummi allassimavoq errorsinermi qaqorsaait kingunerutillu avatangiisinik mianerinnittut nalunaaqutsikkat tipigissaatitaqanngitsullu Namminersorlutik Oqartussat sullissiviini atorneqarnissaat qulakkeerniarlugu tamanna isumaqatigiissutini piunasaqaatitut ilanngunneqarsimasoq.

- a. Namminersorlutik Oqartussat suliffeqarfiutaasa sorliit errorsissutit kingunerutillu avatangiisinik mianerinnittut nalunaaqutsikkanik tipigissaatitaqanngitsunillu atuilersimappat?
- b. Sullissivinnut pineqartunut ilaappat ilinniartunut inissiat, kollegiat, Namminersorlutik Oqartussat ingerlataat?
- c. Taamaassimappat; kollegiani ineqartunut piunasaqaataalersimava errorsissutinik kingunerutinillu avatangiisinut eriniaginnittut nalunaaqutsikkanik tipigissaatitaqanngitsunillu atuissasut?
- d. Taamaassimangippat; taamak piunasaqarnissamut Naalackersuisut pilersaaruteqarpat?

(Inatsisartuni ilaasortaq Sofia Geisler, Inuit Ataqatigiit)

Tungavilersuut:

UKA2019/131-mut siunnersuuteqartut nuannaarutigivara siunnersuutip akuerineqarneraniit sivoorsuunngitsiq ingerlareersoq Namminersorlutik Oqartussat suliffeqarfiutiminnut atatillugu piunasaqaatinngortimassuk avatangiisinut eriaginnittunik tipigissaatitaqanngitsunillu errorsissutinik kingunerutinillu atuinissaq. Taamaasilluni Namminersorlutik Oqartussat maligassiuunngorput. Nunatsinni imermik kuutsittakkatsinnik peruiaasussanik saliivinnik peqanngilagut, taamaamat ulluinnarni ullormut errorsinitsigut imartatsinnut toqqaannartumik mingutsitsisunik, kingunerutit ilanngullugit kuutsitsiinnartarpugut. Errorsinermut qaqorsaait aammalu kingunerutit tamarmik akuutissanik kuuffikkut kuutsitsinikoorlutik pigaangata avatangiisitsinnut ajoqutaangaatsiarsinnaasunik akoqarput.

Kissaatigivara apeqquutikka ullut suliffiusut qulit qaangiutinnginneranni akineqarnissaat.